

Die Astronomisch vnd Arabisch vhr wirt vom Mittag gezelt / als wann es Mittag ist vnser vhr noch 12. so schlecht es bey ihnen 24. Dar nach vber ein stund zellen sie 1. dann 2. also fort den halben tag vber: des gleichen auch die nacht/so es Mitnacht ist / schlecht es 12. darnach vber ein stund 13. also fort die nacht vber/vnd den nachgehenden halben tag darzu bis auff 24. wie gemeldt.

Merck wann die Sonn im Krebs ist/vnd der tag am lengsten / so schlechts wann die Sonn auffgeht 16. darnach wann sie vndergeht 8. wann der tag am kürzesten ist / vnd 8. stund lang/ o schlechts wann die Sonn auffgeht 20. wann die widerumb vndergeht 4.

Die Griechen vnd andere Völcker fahen zu Mitternacht an zu zellen / vnd treiben das fort bis widerumb zu Mitnacht/dann so schlecht es 24.

Die Nürenberger schliessen auch tag vnd nacht zusammen mit 24. stunden / aber sie haben den brauch im zellen / wann die Sonn im Krebs ist/ als dann ist der tag 16. stund / vnd die nacht 8. die zellen sie also/wann die Sonn auffgeht/im puncto schlecht sie 8. als der nacht lenge/darnach vber ein stund schlecht sie widerumb 1. vnd dann fort den ganzen tag vber/bis die Sonn widerumb vndergeht / so schlecht sie 16. als des tags lenge / ein stund nach vndergang der Sonnen/ schlecht sie 1. dann 2. vnd fort die ganze nacht vber/wie angezeigt/also können sie das ganze jahr durch den glockenschlag den auff- vnd nidergang der Sonnen: des gleichen auch tag vnd nacht lenge wissen/ hieraus ist offenbar/das sie ihr stundē von auffgang der Sonnen: des gleichen auch von dem nidergang derselbigen zellen. Die Böhmische vhr facht an ein stund nach vndergang der Sonnen / dann schlecht sie 1. vber ein stund 2. also fort die ganze nacht / auch den nachgehenden tag darzu/bis das die Sonn vnder geht / dann schlechts 24. oder den gar auß.

Zum Exempel/wann die Sonn im Steinbock ist / so schlechts am morgen wann die Sonn auffgeht 16. als der nacht lenge/dann fort vber ein stund 17. dann 18. 2c. bis auff 24. dise werden von nidergang der Sonnen gezelt.

Die Italianer schliessen auch tag vnd nacht zusammen mit 24. stunden/wie andere völcker/wann die Sonn vndergeht / so schlechts 24.